

Y Pwyllgor Plant, Pobl Ifanc ac Addysg

Papur 1

Cyflwyniad

Mae Llywodraeth Cymru wedi ymrwymo i wella canlyniadau addysgol plant o gartrefi sydd ar incwm isel, ac mae ganddi gyfres o bolisiau er mwyn cyflawni hyn.

1. Cynllun Gweithredu ar gyfer Trechu Tlodi

Mae Cynllun Gweithredu ar gyfer Trechu Tlodi Llywodraeth Cymru yn dangos yn glir ein huchelgais i drechu tlodi, yn benodol drwy fuddsoddi er mwyn sicrhau bod plant yn cael y dechrau gorau posibl mewn bywyd. O'r adeg y'u cenhedlir nes iddynt dyfu'n oedolion, ein nod fydd lleihau anghydraddoldeb cyn gynted â phosibl a thorri'r cysylltiad rhwng anfantais economaidd-gymdeithasol, tangyflawni ym myd addysg a'r diffyg cyfleoedd mewn bywyd sy'n aml yn deillio o amddifadedd.

Rydym yn gwybod bod disgyblion sy'n well eu byd fwy na dwywaith yn fwy tebygol o gael pum gradd TGAU dda, gan gynnwys mewn Cymraeg neu Saesneg a Mathemateg, na'r rheini sy'n gymwys i gael prydau ysgol am ddim. Ein gobaith yw cynyddu cyfran y disgyblion o gefndiroedd tlotach sy'n cyrraedd y targed hwn o ychydig dros 23% i 37% erbyn 2017.

Mae tystiolaeth galonogol bod Cymru erbyn hyn yn cau'r bwlch gyda Lloegr ym mhob un o'r prif ddangosyddion. Y llynedd, llwyddodd mwy o ddisgyblion a oedd yn gymwys i gael prydau ysgol am ddim yng Nghymru y lefelau disgwylidig yng Nghyfnod Allweddol 2 nag yn Lloegr. Serch hynny, mae angen gwneud mwy i sicrhau mwy o gydraddoldeb mewn lefelau cyrhaeddiad i ddisgyblion o gefndiroedd tlotach yng Nghymru.

Rhaglen i Fynd i'r Afael ag Effaith Amddifadedd ar Gyrhaeddiad

Rydym wrthi'n datblygu rhaglen i fynd i'r afael ag amddifadedd. Bydd hon yn rhoi fframwaith ar gyfer gweithredu a fydd yn croesi ffiniau adrannol ac yn dod ag amrywiaeth eang o weithgareddau at ei gilydd mewn un cynllun cydlynol. Bydd y rhaglen yn canolbwyntio ar y canlynol:

- Blynyddoedd Cynnar
- Ymgysylltu â'r Gymuned a Theuluoedd
- Gwireddu Dyheadau a Chefnogi Disgyblion i gyflawni eu Potensial
- Datblygu'r Gweithlu

Bydd swyddogion yn gofyn am gyfraniadau gan randdeiliaid allweddol wrth i'r rhaglen gael ei datblygu. Maent eisoes yn gweithio'n agos gyda chydweithwyr sy'n gyfrifol am y Rhaglen Cymunedau yn Gyntaf, Dechrau'n Deg a Teuluoedd yn Gyntaf.

Mae'r gwaith hwn yn cyd-fynd yn dda â gwaith y mae Estyn yn ei wneud i gynorthwyo ysgolion i fynd i'r afael ag effaith tlodi ar amddifadedd. Mae swyddogion yn gweithio'n agos gydag Estyn i sicrhau bod gwaith yn y maes hwn yn cael cymaint o effaith ag y bo modd.

2. Rôl Llywodraeth Cymru, consortia addysg rhanbarthol, awdurdodau lleol, ysgolion a chyrff llywodraethu

Rydym yn helpu ysgolion, awdurdodau lleol a chonsortia i ddatblygu strwythurau cefnogi hanfodol, er enghraifft:

- mabwysiadu systemau clir ar gyfer gweithio gydag asiantaethau allanol i gefnogi dysgwyr difreintiedig;
- darparu cymorth a hyfforddiant i ddatblygu sgiliau arweinwyr ysgolion i reoli'r dasg o weithio mewn partneriaeth er mwyn trechu tlodi; a
- defnyddio'r Grant Amddifadedd Disgyblion i dargedu anghenion disgyblion difreintiedig yn benodol, beth bynnag fo'u gallu.

Model cenedlaethol ar gyfer gweithio ar lefel ranbarthol: Roedd Adolygiad Robert Hill, a gomisiynwyd mewn ymateb i bryderon ynglŷn â pherfformiad awdurdodau lleol ac argymhellion rhanbarthol ar gyfer cryfhau gwaith consortia ar lefel ranbarthol. Ers hynny mae Llywodraeth Cymru a llywodraeth leol wedi cydweithio i ddatblygu model cenedlaethol ar gyfer gweithio ar lefel ranbarthol. Bydd hyn yn sicrhau dull gweithredu mwy cyson, gyda mwy o ffocws iddo, ar draws ardaloedd y pedwar consortiwm ac yn egluro sut mae awdurdodau lleol yn comisiynu gwasanaethau consortia addysg rhanbarthol i sicrhau bod yr ysgolion cyfan yn gwella. Bydd y prif elfennau ar waith erbyn mis Ebrill 2014.

Yn ogystal â gweithgareddau'r consortia o ran gwelliannau a broceriaeth, byddant yn comisiynu ac yn sicrhau ansawdd y modd y darperir gwasanaethau cymorth a hyfforddiant ar gyfer llywodraethwyr, yn enwedig o safbwynt deall a defnyddio data'n effeithiol. Bydd y consortia, gyda'i gilydd, a drwy ymgynghori ag awdurdodau lleol, llywodraethwyr a phenaethiaid, yn llunio templed data perfformiad y gall penaethiaid ei ddefnyddio i adrodd yn ôl i lywodraethwyr bob tymor neu bob hanner tymor. Bydd yr adroddiad yn cynnwys data presenoldeb disgyblion, gwaharddiadau disgyblion, absenoldeb staff oherwydd salwch, ansawdd addysgu, a chynnydd a chyrhaeddiad mewn perthynas â'r targedau.

Yr awdurdodau lleol fydd yn ysgwyddo'r atebolrwydd statudol dros berfformiad ysgolion o hyd, yn ogystal â'r cyfrifoldeb dros ddefnyddio pwerau ymyrryd statudol a threfniadaeth ysgolion.

Plant sy'n Derbyngofal: Rydym wedi ymrwymo i wella canlyniadau addysgol plant sy'n derbyn gofal, a phlant sydd mewn angen yn fwy cyffredinol. Rydym wedi bod mewn cysylltiad ag amrywiaeth eang o randdeiliaid ac arbenigwyr eraill er mwyn hybu'r gefnogaeth ar gyfer cynllun newydd i wella canlyniadau addysgol plant sy'n derbyn gofal.

Er bod swm sylweddol o arian yn mynd tuag at gefnogi plant sy'n derbyn gofal, daeth yn amlwg nad yw'r adnoddau bob amser yn cael eu gweinyddu mewn ffordd strategol a chydgyssylltiedig, ac yn sgil hyn nid yw'r canlyniadau mor effeithiol ag y gallent fod.

Ynghyd â llunio'r cynllun newydd – y Cynllun Plant sy'n Derbyngofal mewn Addysg – rydym wedi gwella'r canllawiau ar y Grant Amddifadedd Disgyblion a'r Grant Effeithiolrwydd Ysgolion. Byddwn hefyd yn parhau â'r gwaith i fapio'r ffrydiau ariannu sy'n mynd at gefnogi plant sy'n derbyn gofal.

Llywodraethwyr Ysgol: Ym mis Medi 2013, cyflwynodd Llywodraeth Cymru hyfforddiant gorfodol yn y meysydd hynny a fydd, yn ein barn ni, yn gwneud y gwahaniaeth mwyaf wrth helpu llywodraethwyr i gyflawni eu swyddogaethau'n effeithiol, sef:

- Hyfforddiant sefydlu i lywodraethwyr newydd i'w galluogi i ddeall eu rôl;
- Hyfforddiant i bob llywodraethwr ar ddeall a defnyddio data ysgolion;
- Hyfforddiant i Gadeiryddion ar sut i roi'r cymorth angenrheidiol i'r pennaeth a'r uwch dîm rheoli, a'u herio, hyn oll er mwyn gwella perfformiad.

Rydym hefyd wedi llunio cynnwys yr hyfforddiant gorfodol ac wedi darparu rhaglenni hyfforddi i awdurdodau lleol ar sut i gyflwyno'r hyfforddiant gorfodol. Mae hynny'n cynnwys tair blaenoriaeth allweddol Llywodraeth Cymru, sef lleihau effaith negyddol tlodi ar gyflawniad a chyrhaeddiad disgyblion, a gwella llythrennedd a rhifedd.

Bydd yr hyfforddiant deall data yn galluogi llywodraethwyr i ddeall data ysgolion yn well, gan gynnwys data disgyblion sy'n cael prydu am ddim, ac i ddefnyddio'r data hwnnw i herio perfformiad. Mae'r rhaglen yn cynnwys adran sy'n rhoi sylw i'r meini prawf a ddefnyddir i sefydlu 'Teulu o Ysgolion' drwy edrych ar gymhwysedd Prydau Ysgol am Ddim disgyblion sy'n byw mewn ardaloedd difreintiedig.

Gall cyrff llywodraethu ysgolion hefyd weithio gyda'i gilydd i drechu tlodi mewn ardaloedd difreintiedig drwy gydweithio a sefydlu cydbwyllgorau. Mae hwn yn drefniant hynod o ddefnyddiol lle mae clystyrau o ysgolion cynradd yn cefnogi ei gilydd i wella perfformiad ysgolion.

Awdurdodau Lleol yn sicrhau bod ysgolion yn cynnwys trechu tlodi mewn hyfforddiant HMS:

Ym mis Mehefin 2013, cyflwynodd Estyn adroddiad ar ddefnyddio diwrnodau HMS statudol yn effeithiol mewn ysgolion. Gwelwyd bod HMS ar ei fwyaf effeithiol mewn ysgolion pan oedd yn ffurfio rhan o system integredig o ddatblygiad proffesiynol parhaus, gyda chyswllt â rheoli perfformiad, hunan-arfarnu a blaenoriaethau ar lefel ysgol ac yn genedlaethol. Yn ogystal â hyn, tynnodd Estyn sylw at bwysigrwydd cysylltu darpariaeth ar gyfer datblygiad proffesiynol â chynlluniau gwella ysgolion.

Mae'r canfyddiadau'n nodi bod llythrennedd ac, i raddau ychydig yn llai, rhifedd, wedi'u blaenoriaethu fel pynciau HMS. Mae lleihau effaith tlodi ar gyrhaeddiad wedi cael cryn dipyn yn llai o sylw ac mae'r adroddiad yn cynnwys yn benodol ddau argymhelliad sy'n gysylltiedig â'r maes hwn: y dylai ysgolion ganolbwyntio mwy ar flaenoriaethau cenedlaethol mewn gweithgareddau HMS, fel mynd i'r afael ag effaith tlodi ar gyflawniad, a bod cyswllt agos rhwng HMS a'r blaenoriaethau ar gyfer gwella'r ysgol. Roedd ymateb Llywodraeth Cymru yn derbyn cyd-destun yr argymhellion hyn ac ysgrifennodd swyddogion at awdurdodau lleol a'r consortia rhanbarthol ym mis Medi y llynedd yn gofyn iddynt ystyried yr argymhellion hyn yn eu gwaith gydag ysgolion.

3. Ymgysylltu â Rhieni

Mae'r Rhaglen Amddifadedd Addysg a Sgiliau sy'n datblygu yn cynnwys elfen benodol sy'n anelu at wella'r gwaith o ymgysylltu â rhieni a'r gymuned. Bydd canllawiau pwrpasol ar gyfer ymgysylltu â rhieni a'r gymuned, ynghyd â Rhaglen

Ymgysylltu, yn cefnogi amcanion yr elfen hon. Mae rhaglenni ar draws Llywodraeth Cymru sy'n cefnogi'r blynyddoedd cynnar ac yn helpu i baratoi plant ifanc o gefndiroedd difreintiedig ac anodd sy'n dod i mewn i'r system addysg.

Dechrau'n Deg: Dechrau'n Deg, a lanswyd yn 2006/2007, yw prif raglen Llywodraeth Cymru ar gyfer y blynyddoedd cynnar. Nod y rhaglen hon yn y tymor hir yw lleihau maint y boblogaeth sydd heb lawer o sgiliau, gyda'r bwriad yn y pen draw o fynd i'r afael ag anghydraddoldeb o ran incwm. Rhaglen sy'n seiliedig ar ardal yw hon, ac mae hi wedi'i thargedu'n ddaearyddol at rai o ardaloedd mwyaf difreintiedig Cymru. Mae hi ar gael yn gyffredinol i deuluoedd gyda phlant rhwng dim a phedair oed yn yr ardaloedd hynny.

Mae Dechrau'n Deg yn canolbwyntio ar y plentyn gyda'r bwriad o wella'r canlyniadau i blant drwy ddarparu pedwar hawl allweddol:

- gwell gwasanaeth ymwelwyr ieuchyd, gyda'r targed ar gyfer baich gwaith ymwelwyr ieuchyd yn ddim mwy nag un ymwelydd ieuchyd i 110 o blant (cymhareb o 1:110) ym mhob ardal Dechrau'n Deg;
- rhaglenni cymorth ym maes magu plant sydd wedi'u seilio ar dystiolaeth er mwyn cwrdd â'r galw'n lleol;
- cymorth ar gyfer datblygiad iaith yn y blynyddoedd cynnar (yn bennaf ar ffurf rhaglenni iaith a Chwarae);
- gofal plant rhan-amser a di-dâl o safon uchel i blant dwy i dair oed ac iau pan welir yr angen. Cynigir Dechrau'n Deg am ddwy awr a hanner y dydd, bum diwrnod yr wythnos am 39 wythnos. Yn ogystal, dylai o leiaf 15 o sesiynau gael eu cynnig i deuluoedd yn ystod gwyliau'r ysgol.

Mae'r hawliau hyn yn cynnwys ffocws cyffredinol ar adnabod anghenion cymorth ychwanegol yn fuan.

Rhoddir mwy o gymorth i rieni drwy gynnig gwell mynediad at ofal plant, ymwelwyr ieuchyd a rhaglenni sydd, er enghraifft, yn ceisio gwella datblygiad plant (o ran sgiliau cyfathrebu, ymddygiad, cymdeithasol neu wybyddol), gan hwyluso'r gwaith o adnabod anghenion yn gynnar, a chefnogi'r broses o integreiddio gwasanaethau (drwy rannu data, er enghraifft).

Teuluoedd yn Gyntaf: dyma ran allweddol o waith Llywodraeth Cymru i drechu tlodi plant: cynlluniwyd y rhaglen i roi sylw i'r amcanion strategol yn Strategaeth Tlodi Plant Cymru a gyhoeddwyd yn 2011. Mae'n ceisio diwallu anghenion teuluoedd cyfan, yn hytrach nag unigolion mewn teuluoedd, a chydlynu'r cymorth y mae teuluoedd yn ei gael gan wahanol asiantaethau.

Mae Teuluoedd yn Gyntaf yn cynnwys pum elfen allweddol y mae'n rhaid i bob awdurdod ei rhoi ar waith wrth gyflwyno'r rhaglen. Er hynny, maent yn cael yr hyblygrwydd i benderfynu sut maent yn rhoi pob un o'r elfennau hyn ar waith yn lleol. Oherwydd hyn, mae Teuluoedd yn Gyntaf yn gweithredu mewn ffyrdd pur wahanol o un awdurdod i'r llall yng Nghymru.

Dyma bum elfen allweddol Teuluoedd yn Gyntaf:

- defnyddir Fframwaith Asesu'r Teulu ar y Cyd i asesu anghenion y teulu cyfan;

- model Tîm o Amgylch y Teulu sy'n goruchwylio ac yn cydlynu'r ymyriadau y mae teuluoedd yn eu cael;
- cyfres gydlynus o brosiectau neu wasanaethau sydd wedi'u comisiynu'n strategol, yn gyfyngedig i amser ac yn canolbwyntio ar y teulu (mewn ymateb i asesiad o anghenion yn y gymuned);
- cyfranogaeth mewn setiau dysgu rhwng awdurdodau yn genedlaethol ac yn lleol; a
- gwell cefnogaeth i deuluoedd gyda phlant a phobl ifanc anabl.

Y Grant Cyrhaeddiad Lleiafrifoedd Ethnig a'r Grant Addysg Sipsiwn a Theithwyr

Mae'r hawl i brydau ysgol am ddim yn amrywio'n sylweddol rhwng gwahanol grwpiau lleiafrifoedd ethnig, gyda'r prydau ysgol am ddim i blant Sipsiwn a Theithwyr a phlant Du Affricanaidd yn bell dros dair gwaith y ffigur cyfartalog cenedlaethol. Mae'r Grant Cyrhaeddiad Lleiafrifoedd Ethnig a'r Grant Addysg Sipsiwn a Theithwyr yn ceisio gwella cyflawniadau'r grwpiau hyn o ddysgwyr ac mae'r rheini sydd hefyd yn gymwys i gael prydau ysgol am ddim hefyd yn gymwys i gael help gan y Grant Amddifadedd Disgyblion.

4. Cyllid – materion perthnasol

Y Grant Effeithiolrwydd Ysgolion a'r Grant Amddifadedd Disgyblion yw'r prif ddulliau sydd gan Lywodraeth Cymru o ddarparu cymorth ariannol i gyflawni ein tair blaenoriaeth genedlaethol ar gyfer ysgolion; gwella safonau llythrennedd a rhifedd a lleihau effaith tlodi ar gyrhaeddiad addysgol.

Mae'r Grant Effeithiolrwydd Ysgolion yn rhoi cymorth i wella llythrennedd a rhifedd ond mae hefyd yn cynnwys elfen o gymorth i leihau effaith tlodi. Mae'r Grant Amddifadedd Disgyblion yn darparu arian a dargedir i leihau effaith tlodi ar gyrhaeddiad addysgol.

Mae'r grant yn cynnig cymorth ar gyfer consortia rhanbarthol, awdurdodau lleol ac ysgolion i roi amrywiol gamau gweithredu a geir yn y Rhaglenni Llythrennedd a Rhifedd Cenedlaethol ar waith. Mae hyn yn cynnwys gwneud yn siŵr bod pob athro yn meddu ar y sgiliau llythrennedd a rhifedd angenrheidiol i wreiddio'r sgiliau hyn ar draws y cwricwlwm ac i roi'r Fframwaith Llythrennedd a Rhifedd ar waith.

Un o themâu canolog y Rhaglenni Llythrennedd a Rhifedd a'r Grant Effeithiolrwydd Ysgolion yw ymyriadau a dargedir ar lefel ysgol, dosbarth a disgybl. Mae disgwyl i ysgolion ddefnyddio data'n gyson ac yn drylwyr er mwyn mynd ati i adnabod anghenion dysgwyr yn gynnar, gan sicrhau bod pob dysgwr yn cyflawni ei botensial. Mae cyllid yn cael ei ddarparu i hyfforddi athrawon ac addysgwyr i gyflwyno rhaglenni dal-i-fyny i ddisgyblion sydd ar ei hôl hi o'u cymharu â'u cyd-ddisgyblion. Mae cymorth ar gael hefyd i wneud yn siŵr bod dysgwyr mwy abl a thalentog yn cael eu herio'n briodol.

Gofynnwyd i'r consortia rhanbarthol adnabod, datblygu a defnyddio athrawon llythrennedd a rhifedd eithriadol sy'n gallu hyfforddi, mentora a throsglwyddo eu gwybodaeth i athrawon eraill. Byddant yn cefnogi ein Cymunedau Dysgu Proffesiynol ac yn bod yn bartneriaid i athrawon ac ysgolion eraill er mwyn meithrin a

gwreiddio sgiliau llythrennedd a rhifedd a helpu i hybu arferion da yn yr ystafell ddsbarth.

I leihau effaith tlodi ar gyrhaeddiad addysgol, mae'n rhaid i'r consortia ddangos gwelliannau mewn perthynas â phump o ganlyniadau allweddol:

- mae'r bwlch mewn cyrhaeddiad rhwng disgyblion sydd â hawl i brydau ysgol am ddim a disgyblion heb hawl i brydau ysgol am ddim wedi lleihau dros y tair blynedd
- mae'r bwlch mewn cyrhaeddiad rhwng plant sy'n derbyn gofal a phob disgybl wedi lleihau dros y tair blynedd
- mae lefelau presenoldeb dysgwyr sydd â hawl i brydau ysgol am ddim a gefnogir gan y grant yn gwella
- mae lefelau presenoldeb dysgwyr sy'n derbyn gofal a gefnogir gan y grant yn gwella
- mae cynlluniau a ariannwyd gan y Grant Amddifadedd Disgyblion yn cynnwys gwaith ymgysylltu â rhieni a'r gymuned a gweithio mewn partneriaeth.

Ar gyfer 2013-14, mae cymorth a dargedir ar gyfer plant sy'n derbyn gofal wedi cael ei gynnwys yn y Grant Amddifadedd Disgyblion yn hytrach nag yn y Grant Effeithiolrwydd Ysgolion; fodd bynnag, mae gweithgarwch sy'n cefnogi plant sy'n derbyn gofal yn dal i gael ei ystyried yn gymwys o dan y Grant Effeithiolrwydd Ysgolion.

Dyrannu grantiau: Mae'r Grant Effeithiolrwydd Ysgolion yn cael ei ddyrannu i'r consortia ar sail nifer y disgyblion 5-15 oed ym mhob consortiwm (60%), nifer y disgyblion 5-15 oed sy'n gymwys i gael prydau ysgol am ddim (20%), a nifer yr ysgolion ym mhob consortiwm (20%).

Mae'r Grant Amddifadedd Disgyblion yn cael ei ddyrannu i ysgolion ar sail nifer y disgyblion 5-15 oed sy'n gymwys i gael prydau ysgol am ddim, yn seiliedig ar ddata'r Cyfrifiad Ysgolion Blynyddol ar Lefel Disgyblion a nifer y plant sy'n derbyn gofal, 4-15 oed, yn seiliedig ar ddata Gweithgarwch Adrannau'r Gwasanaethau Cymdeithasol. Cyhoeddwyd canllawiau diwygiedig ym mis Rhagfyr 2013, gyda gofynion am ddulliau seiliedig ar dystiolaeth i fynd i'r afael â thangyflawni ymhlith disgyblion tlotach.

Mae'r bwlch yn lleihau ym mhob cyfnod allweddol, gyda rhai gwelliannau bach yng Nghyfnod Allweddol 3 a 4 yn ystod y ddwy flynedd ddiwethaf. Er bod y Grant Amddifadedd Disgyblion nawr yn ei ail flwyddyn, mae'n rhy fuan dod i benderfyniad am ei effaith, ond mae gwerthusiad tair blynedd ar y gweill gan Ipsos Mori a WISERD. Gofynnwyd iddynt roi adborth ac enghreifftiau o arferion da yn ystod cyfnodau allweddol drwy gydol y cyfnod gwerthuso er mwyn hybu gwelliannau eraill.

Y pedwar consortiwm rhanbarthol sy'n gyfrifol am gefnogi a herio ysgolion o ran sut maent yn helpu disgyblion sydd â hawl i brydau ysgol am ddim i wella cyrhaeddiad. Ar hyn o bryd, mae Llywodraeth Cymru yn edrych ar y sefyllfa yn y rhanbarthau gyda phob consortiwm er mwyn herio effaith eu gwaith gydag ysgolion ar ddefnyddio'r Grant Amddifadedd Disgyblion. Mae swyddogion hefyd wedi bod yn gweithio gydag Estyn i gryfhau'r broses arolygu o safbwynt cefnogi cyflawniad disgyblion tlotach a defnyddio adnoddau, gan gynnwys y Grant Amddifadedd Disgyblion at y diben hwn.

5. Costau sy'n gysylltiedig ag addysg

Mae gan Lywodraeth Cymru nifer o raglenni a pholisïau ar waith i roi help ymarferol i blant o gartrefi sydd ar incwm isel er mwyn sicrhau nad ydynt yn ddifreintiedig o safbwynt costau sy'n gysylltiedig ag addysg.

Grant Gwisg Ysgol: Yn 2005, cyflwynodd Llywodraeth Cymru gynllun grant gwisg ysgol ar gyfer Cymru gyfan. Mae'r Grant Gwisg Ysgol ar gael i ddisgyblion sy'n cychwyn ym mlwyddyn 7 mewn ysgolion a gynhelir yng Nghymru ac sy'n gymwys i gael prydau ysgol am ddim. Mae'r Grant hefyd ar gael i ddisgyblion mewn ysgolion arbennig, canolfannau adnoddau anghenion arbennig ac unedau cyfeirio disgyblion sy'n 11 oed ar ddechrau'r flwyddyn ysgol ac sy'n gymwys i gael prydau ysgol am ddim.

Yn 2013-14, bydd disgyblion cymwys yn cael taliad o £105, fel arfer ar ffurf siec, talebau, trosglwyddiad BACS neu, mewn achosion penodol, bydd eitemau gwisg ysgol yn cael eu darparu.

Peidio â chodi tâl sy'n ymwneud â theithiau preswyl

Mewn ysgolion heblaw ysgolion annibynnol, mae'r addysg sy'n cael ei ddarparu naill ai'n gyfan gwbl neu'n bennaf yn ystod oriau ysgol am ddim. Mae hyn yn golygu na chaiff penaethiaid godi tâl ar rieni am unrhyw ymweliad sy'n digwydd yn ystod oriau ysgol, nac am unrhyw gostau cludiant sy'n gysylltiedig â hynny.

Serch hynny, caiff yr ysgol gynnig i rieni roi cyfraniadau gwirfoddol tuag at gost gweithgareddau, er enghraifft, gwersi nofio, a/neu gostau cludiant hyd yn oed os yw'r gweithgaredd yn cael ei gynnig fel rhan o'r cwricwlwm cenedlaethol. Wrth ofyn am gyfraniad, mae'n rhaid dweud yn glir nad oes unrhyw ddyletswydd gyfreithiol i roi cyfraniad gwirfoddol, ac na fydd y disgyblion hynny'n cael eu trin yn wahanol i'r disgyblion y mae eu rhieni wedi rhoi cyfraniad. Os nad oes digon o gyfraniadau gwirfoddol i allu bwrw ymlaen â'r gweithgaredd, ac os nad oes ffordd arall o dalu am yr hyn sy'n weddill, bydd yn rhaid canslo'r gweithgaredd. Os yw gweithgaredd yn cael ei gynnig y tu allan i'r diwrnod ysgol ac nad yw'n rhan o'r cwricwlwm cenedlaethol, caiff ysgolion godi tâl.

Ni chaiff ysgol godi tâl ar rieni am ddim byd oni bai fod y corff llywodraethu wedi mabwysiadu polisi codi tâl sy'n dweud ym mha amgylchiadau y bydd yr ysgol yn codi tâl ar rieni a phryd y caiff ofyn am gyfraniadau gwirfoddol. Dylai'r polisi hefyd egluro unrhyw amgylchiadau lle na fydd yr ysgol yn codi tâl, naill ai'n llawn neu'n rhannol. Dylai'r corff llywodraethu sicrhau bod rhieni'n ymwybodol o'r polisi codi tâl.

Mae rhieni a gofalwyr sy'n cael y budd-daliadau sy'n ffurfio'r meini prawf cymhwysedd ar gyfer Prydau Ysgol am Ddim wedi'u heithrio rhag talu costau bwyd a llety.

Mae peidio â chodi tâl am fwyd a llety ar deithiau preswyl yn dod o dan reolaeth yr ysgol, a'r ysgol fydd yn talu'r costau hyn.

Mae Llywodraeth Cymru wedi ychwanegu darpariaeth yn y Rheoliadau Addysg (Peidio â Chodi Tâl sy'n Ymwneud â Theithiau Preswyl) (Cymru) (Diwygio) 2013, er mwyn caniatáu i ddisgyblion y mae eu rhieni'n cael Credyd Cynhwysol i hawlio bwyd a llety am ddim ar daith breswyl gyda'r ysgol.

6. Prydau Ysgol am Ddim – materion perthnasol

Hawl i Brydau Ysgol am Ddim – Os yw'r rhiant, y gofalwr neu'r unigolyn ifanc ei hun yn gallu profi ei fod yn cael y budd-daliadau canlynol, mae'n gymwys i gael prydau ysgol am ddim:

- a. Cymhorthdal Incwm.
- b. Lwfans Ceisio Gwaith yn Seiliedig ar Incwm.
- c. Unrhyw fudd-dal neu lwfans arall, neu hawl i unrhyw gredyd treth o dan Ddeddf Credydau Treth 2002 neu elfen o gredyd treth o'r fath, fel y pennir gan reoliadau o bryd i'w gilydd. Ar hyn o bryd mae'r canlynol yn cael eu pennu:
 - cymorth o dan Ran 6 o Ddeddf Mewnfudo a Lloches 1999;
 - Credyd Treth Plant, ar yr amod nad yw Credyd Treth Gwaith yn cael ei dderbyn hefyd ac nad yw incwm y teulu (fel yr asesir gan Gyllid a Thollau Ei Mawrhydi) yn fwy na £16,190 – h.y. plant sy'n gymwys i gael prydau ysgol am ddim;
 - Lwfans Cyflogaeth a Chymorth yn Seiliedig ar Incwm.
 - Credyd Cynhwysol
- d. Elfen gwarant Credyd Pensiwn y Wladwriaeth.

Cyfraddau'r Nifer sy'n Hawlio: Ar ddiwrnod y Cyfrifiad Ysgolion Blynyddol ar Lefel Disgyblion ym mis Ionawr 2013 roedd 62,583 o blant yn hawlio prydau ysgol am ddim, sef 75% o'r rheini a oedd â'r hawl i gael prydau ysgol am ddim. Mae cyfraddau'r nifer sy'n hawlio prydau ysgol am ddim yng Nghymru wedi gostwng rhyw fymryn dros y deng mlynedd diwethaf ac yn gyffredinol mae'r niferoedd ychydig yn is mewn ysgolion uwchradd nag mewn ysgolion cynradd.

Y Stigma sy'n gallu bod ynghlwm â Hawlio Prydau Ysgol am Ddim: Mae arolwg gan Gymdeithas Llywodraeth Leol Cymru yn 2011 yn awgrymu mai'r prif beth oedd yn destun pryder i ddisgyblion a oedd â hawl i brydau ysgol am ddim oedd ciwio, yn hytrach na'r stigma sy'n gallu bod ynghlwm â hawlio prydau ysgol am ddim fel y cyfryw. Y prif bryderon eraill oedd y math o fwyd a oedd ar gael; y gost (tybir mai 'lwfans' yr awdurdod lleol ar gyfer eu prydau oedd hyn) ac, i ddisgyblion â'r hawl i brydau ysgol am ddim nad oeddent yn eu hawlio, yr hyn yr oedd eu ffrindiau'n ei wneud. Roedd hefyd yn awgrymu nad yw systemau di-arian bob amser yn arwain at fwy yn manteisio ar eu hawl i brydau ysgol am ddim.

Y Meini Prawf Cymhwysedd ar gyfer Prydau Ysgol am Ddim gan ystyried y symudiad at Gredyd Cynhwysol: Mae agenda Diwygio Lles Llywodraeth y DU yn effeithio ar y meini prawf cymhwysedd ar gyfer prydau ysgol am ddim gan y bydd Credyd Cynhwysol yn disodli'r taliadau cymorth sy'n bodoli ar hyn o bryd. Mae swyddogion Llywodraeth Cymru yn parhau i weithio ar y broses o lunio opsiynau cyflwyno ar gyfer budd-daliadau wedi'u hawdurdodi Llywodraeth Cymru, gan gynnwys prydau ysgol am ddim, fel rhan o'r gwaith o gyflwyno Credyd Cynhwysol yng Nghymru. Y bwriad yn y tymor hir yw cynnal opsiwn cost-niwtral gydag oddeutu'r un faint o deuluoedd yn gymwys i gael prydau ysgol am ddim ag sy'n wir ar hyn o bryd. Felly bydd angen gwneud rhagor o newidiadau i'r meini prawf cymhwysedd.

Defnyddio Prydau Ysgol am Ddim fel dangosydd procsi ar gyfer diffyg incwm

Gan fod prydau bwyd am ddim yn cael eu defnyddio fel dangosydd amddifadedd, bydd newidiadau i'r meini prawf cymhwysedd yn effeithio ar ffrydiau grant penodol ac ar ddangosyddion atebolrwydd a pherfformiad allweddol fel bandio ysgolion, pecynnau data ysgolion, Fy Ysgol Leol, arolygiadau ysgol Estyn, a nifer o dargedau yn y Cynllun Gweithredu ar gyfer Trechu Tlodi a'r Rhaglen Lywodraethu.

Ystyriaethau Cyfannol Eraill ynghylch: Prydau Ysgol am Ddim; *Menter Brechwast am Ddim mewn Ysgolion Cynradd*: Ers 2013, o dan adran 88 o'r ddeddf Safonau a Threfniadaeth Ysgolion, mae'n Ddyletswydd statudol ar awdurdodau lleol erbyn hyn i gynnig brechwast am ddim mewn ysgolion cynradd a gynhelir yng Nghymru, os gofynnir am hynny. Mae Llywodraeth Cymru yn darparu cyllid, drwy'r Grant Cynnal Refeniw, i bob awdurdod lleol yng Nghymru ar gyfer y Fenter Brechwast am Ddim mewn Ysgolion Cynradd. Ar hyn o bryd, dyma'r unig lefel o ddarpariaeth gyffredinol ar gyfer bwyd ysgol sydd am ddim yng Nghymru, ac roedd y nifer a oedd yn hawlio ar lefel ysgol yn 78.87% (PLASC 2013). Yn 2013-14, darparwyd £14.7m ar gyfer brechwast am ddim.

7. Tlodi Plant: Defnyddio Addysg i Ddileu Tlodi

Mae'r Adran Addysg a Sgiliau wedi gweithredu ar yr argymhellion yn Adroddiad y Pwyllgor, "Child Poverty: Eradication through Education", sy'n rhan o'i chyfrifoldebau.

Gwybodaeth ychwanegol y gofynnwyd amdani ar gyfer y Papur Tystiolaeth Ysgrifenedig i'r Pwyllgor Plant a Phobl Ifanc

Strategaeth Llywodraeth Cymru:

Effeithiolrwydd Pecyn Ymddiriedolaeth Sutton a'r defnydd ohono yng Nghymru.

Mae Pecyn Ymddiriedolaeth Sutton, a ddatblygwyd gan Brifysgol Durham ar y cyd â'r Sefydliad Gwaddol Addysgol (EEF), yn ffynhonnell wybodaeth sydd wedi hen ennill ei phlwyf. Mae holl brosiectau EEF yn cael eu gwerthuso'n drylwyr gan arbenigwyr annibynnol ym maes ymchwil addysgol. Mae faint mae'r Pecyn yn cael ei ddefnyddio gan addysgwyr mewn gwledydd lle siaredir Saesneg ar hyd a lled y byd, yn ogystal â'r DU, ynghyd â'r ffaith bod yr ymyriadau sydd ynddo yn cael eu gwerthuso'n gyson, yn sicrhau eu bod yn effeithiol.

Mae cyfnod cwmpasu cychwynnol gwerthusiad o'r Grant Amddifadedd Disgyblion, a gomisiynwyd gan Lywodraeth Cymru, yn dangos mai ychydig o gyfeirio sydd at y Pecyn yng Nghymru i bob golwg, er bod maint y sampl yn rhy fach i ddod i gasgliadau pendant. Hefyd, mae'n bosibl nad oedd y rheini a gyfwelwyd yn y cyfnod cwmpasu wedi bod yn ddigon agos at y gwaith o reoli'r grant i bwysu a mesur yn fanwl sut oedd yn cael ei ddefnyddio. Bydd hyn yn cael sylw wrth i'r gwerthusiad fynd rhagddo.

Mae canllawiau newydd ar ddefnyddio'r Grant Amddifadedd Disgyblion wedi cael eu cyhoeddi ers hynny sy'n dweud yn gwbl glir bod disgwyl i ysgolion ddefnyddio dulliau sy'n seiliedig ar dystiolaeth fel y rheini sy'n cael eu disgrifio ym mhecyn Ymddiriedolaeth Sutton ac EEF. Fodd bynnag, mae ffynonellau gwybodaeth eraill sy'n edrych ar beth sy'n gweithio, a gellir gweld y rhain ar wefan Dysgu Cymru o dan y Maes Gwella Tlodi.

Bydd Llywodraeth Cymru yn cyfarfod â'r consortia rhanbarthol ddechrau Chwefror i gael sicrwydd bod y Grant Amddifadedd Disgyblion yn cael ei ddefnyddio i gyflwyno atebion sy'n seiliedig ar dystiolaeth.

Mae dulliau eraill sy'n seiliedig ar dystiolaeth yn cael eu hargymell i addysgwyr yng Nghymru, gan gynnwys rhaglen Families and Schools Together (FAST) Achub y Plant, a rhaglen Achievement for All 3As.

Ymateb y Gweinidog i'r adroddiad cyntaf ar ganfyddiadau'r Comisiwn Symudedd Cymdeithasol a Tlodi Plant.

Ar 2 Medi 2013, ymatebodd Vaughan Gething AC, y Dirprwy Weinidog Trechu Tlodi, i'r Comisiwn, gan ddisgrifio'r cynnydd a adroddwyd gan Weinidogion Llywodraeth Cymru wrth gyflawni'r amcanion yn y Strategaeth Tlodi Plant.

Mae'r wybodaeth a ddarparwyd i'r Comisiwn [ynghylch Addysg](#) i'w gweld isod o dan benawdau:

Mae perfformiad disgyblion sydd â hawl i brydau ysgol am ddim a disgyblion heb hawl i brydau ysgol am ddim wedi gwella bob blwyddyn ers 2006, ac eithrio yng nghyfnod allweddol 4.

Cynyddodd y bwlch mewn perfformiad yng nghyfnod allweddol 4 bob blwyddyn rhwng 2006 a 2010, ond mae'r bwlch wedi lleihau dros y ddwy flynedd ddiwethaf.

Mae'r data diweddaraf ar gyfer 2013 (a gyhoeddwyd ar 22 Ionawr 2014), yn dangos bod y duedd hon yn parhau gyda 25.8% o ddisgyblion â hawl i brydau ysgol am ddim yn cyrraedd y trothwy lefel 2 yn 2013, o'i gymharu â 23.4 yn 2012.

Mae'r lefelau cyrhaeddiad wedi codi'n gyffredinol ond mae'r ffigurau ar gyfer disgyblion sydd â hawl i brydau ysgol am ddim wedi codi mwy na'r ffigurau ar gyfer disgyblion nad oes ganddynt hawl i brydau ysgol am ddim ym mhob cyfnod allweddol, gan gynnwys y Cyfnod Sylfaen.

Drwy gyfrwng y Grant Effeithiolrwydd Ysgolion a'r Grant Amddifadedd Disgyblion, mae Llywodraeth Cymru yn gweithredu i wella safonau llythrennedd a rhifedd ac i fynd i'r afael ag effaith tlodi ar gyrhaeddiad addysgol. Mae Setliad y Gyllideb ar gyfer 2014/15:

- yn cadw'r ymrwymiad i gynyddu gwariant ar ysgolion dros y ddwy flynedd nesaf;
- yn cynnig cymorth a dargedir i leihau anghydraddoldeb mewn cyrhaeddiad drwy ymestyn y Grant Amddifadedd Disgyblion i 2015-16; ac
- yn darparu £35m o fuddsoddiad ychwanegol yn 2014-15 i gynyddu'r Grant Amddifadedd Disgyblion o £450 y disgybl i £918.

Comisiynodd Llywodraeth Cymru dros 1700 o leoedd i bobl ifanc gymryd rhan yn y rhaglen Llwybrau at Brentisiaethau yn 2012/13. Mae'r rhaglen honno'n cael ei hariannu'n rhannol drwy Gronfa Gymdeithasol Ewrop.

Ym mis Hydref 2012, lansiodd y cyn Weinidog Addysg a Sgiliau gynllun gweithredu cenedlaethol newydd ar gyfer addysg disgyblion rhwng 3 ac 16 oed yng Nghymru, sef 'Gwella ysgolion'. Mae'r cynllun yn nodi'r tair blaenoriaeth genedlaethol ar gyfer addysg, sef gwella cyrhaeddiad mewn llythrennedd a rhifedd a lleihau effaith tlodi ar gyrhaeddiad addysgol.

Mae'r Datganiad Polisi newydd ar Addysg Uwch, a gyhoeddwyd ym mis Mehefin 2013, yn ail-gadarnhau ymrwymiad Llywodraeth Cymru i agor addysg uwch i bawb sydd â'r potensial i elwa ohono, beth bynnag yw eu hoedran, eu rhyw, eu modd a'u lefel astudio, eu gwlad enedigol neu'u cefndir.

Ar 17 Mehefin 2013, lansiodd y Gweinidog Addysg a Sgiliau, y Gweinidog Cymunedau a Threchu Tlodi a'r Dirprwy Weinidog Trechu Tlodi gynllun newydd, sef Adeiladu Dyfodol Mwy Disglair: Cynllun Blynnyddoedd Cynnar a Gofal Plant. Mae'r Cynllun yn gosod cyfeiriad ar gyfer y deng mlynedd nesaf gyda chamau gweithredu ac amserlenni ar gyfer cyflawni. Mae'n cydlynu gwahanol bolisiau a rhaglenni sy'n effeithio ar y blynnyddoedd cynnar ac sy'n dylanwadu arnynt.

Targedau/Monitro

Unrhyw faterion y mae'r Gweinidog yn dymuno tynnu sylw'r Pwyllgor atynt o ran Cynnydd tuag at y ddau darged ar gyfer 2017 yn Creu Cymunedau Cryf: Symud Ymlaen â'r Cynllun Gweithredu ar gyfer Trechu Tlodi i leihau'r bwlch cyrhaeddiad.

Gan mai yn ddiweddar y cyflwynwyd y Cyfnod Sylfaen, dim ond ers dwy flynedd y mae dangosyddion wedi bod ar waith. Yn 2012, roedd canran y disgyblion a oedd yn gymwys i gael prydau ysgol am ddim a gyrhaeddodd y Dangosydd Cyfnod Sylfaen yn 66.2%, o'i gymharu ag 84.5% ar gyfer disgyblion heb hawl i brydau ysgol am ddim. Yn 2013, roedd y canrannau hyn wedi codi i 69.2% ac 86.9%. Felly, mae cyfradd y cyrhaeddiad wedi codi'n gyffredinol yn y Cyfnod Sylfaen ond mae'r gwahaniaeth rhwng disgyblion sydd â hawl i brydau ysgol am ddim a disgyblion heb hawl i brydau ysgol am ddim wedi gostwng 0.6 pwynt canran. Er nad yw'n bosibl dod i gasgliadau wrth edrych ar ddim ond dwy flynedd o ddata, os bydd pethau'n parhau i wella ar y gyfradd hon, bydd y bwlch wedi lleihau 3 phwynt canran erbyn 2017. Mewn geiriau eraill bydd y canlyniad ar gyfer y Cyfnod Sylfaen 1.2 bwynt canran uwchlaw'r targed.

Y prif ddull o fesur perfformiad plant 15 oed yw'r Trothwy Lefel 2 sy'n cynnwys TGAU gradd C neu uwch mewn Cymraeg neu Saesneg iaith gyntaf a mathemateg (L2 yn gynnwysedig). Roedd cyfran y dysgwyr â hawl i brydau ysgol am ddim a gyrhaeddodd y trothwy hwn yn 2012 yn 23.4% o'i gymharu â 56.6% o ddysgwyr heb hawl i brydau ysgol am ddim. Mae'r cynnydd yn erbyn y mesur hwn wedi bod yn gwella o un flwyddyn i'r llall ac mae cyfradd y gwelliant wedi bod yn cynyddu.

Dyma'r gwelliannau ym mherfformiad disgyblion sydd â hawl i brydau ysgol am ddim:

- 0.6 pwynt canran rhwng 2009 a 2010;
- 1.3 pwynt canran rhwng 2010 a 2011;
- 1.4 pwynt canran rhwng 2011 a 2012; a
- 2.4 pwynt canran rhwng 2012 a 2013

O ystyried y cynnydd hwn yng nghyfradd y cynnydd, ynghyd ag effaith y Grant Amddifadedd Disgyblion, y canllawiau cadarnach, y deunyddiau a'r amryw fesurau eraill sydd wedi'u rhoi ar waith neu sydd wrthi'n cael eu datblygu, mae hyn yn golygu ein bod ar y trywydd iawn i gyrraedd y targed ar gyfer Cyfnod Allweddol 4.

Rôl Ysgolion Bro wrth gau'r Bwlch Cyrhaeddiad

Yn 2011, cytunwyd y byddai nifer o ffrydiau cyllid grant yn cael eu dwyn ynghyd i greu un grant, sef y Grant Effeithiolrwydd Ysgolion. Roedd y Grant Effeithiolrwydd Ysgolion yn disodli ac yn cydgrynhoi arian a oedd yn arfer cael ei ddarparu drwy nifer o gynlluniau grant llai, gan gynnwys y grant Ysgolion Bro. Nod y Grant Effeithiolrwydd Ysgolion ar y dechrau oedd gwella effeithiolrwydd ysgolion ac roedd y canllawiau'n dangos pwysigrwydd Ysgolion Bro fel rhan o agenda i godi safonau ac i fodloni blaenoriaethau cenedlaethol, gan gynnwys torri'r cysylltiad rhwng cyrhaeddiad a thlodi plant.

Un o nodau allweddol y Grant Effeithiolrwydd Ysgolion yw mynd ati'n frwd i

hyrwyddo'r egwyddor y dylai pob ysgol ganolbwyntio ar y gymuned, gan dargedu cymorth ychwanegol i alluogi ysgolion mewn ardaloedd mwy difreintiedig i wireddu'r ddefnydd yn gyflymach ac yn fwy dwys.

Cyflwynwyd cyllid ychwanegol penodol i gefnogi cyrhaeddiad addysgol disgyblion o gefndiroedd difreintiedig yn 2012 drwy'r Grant Amddifadedd Disgyblion. Cafwyd £3 miliwn o arian cyfatebol ar gyfer hyn gan Cymunedau yn Gyntaf er mwyn annog ysgolion i weithio gyda'u cymunedau lleol mewn ardaloedd difreintiedig. Bu'r swyddogion a oedd yn gyfrifol am reoli'r grantiau a'r polisiau o'u hamgylch yn cydweithio i lunio'r meini prawf cyllido i sicrhau bod ysgolion a'u cymunedau yn gweithio'n effeithiol mewn partneriaeth â'i gilydd.

Yn ystod 2014, bydd ein Rhaglen Amddifadedd yn rhoi mwy o bwyslais ar strategaethau i gynnwys rhieni anos eu cyrraedd o gymunedau difreintiedig yn addysg eu plant. Bydd y Rhaglen yn cynnwys elfen benodol wedi'i hanelu at wella gwaith ymgysylltu â rhieni a'r gymuned. Bydd cymorth o'r fath yn cynnwys datblygu canllawiau pwrpasol ar gyfer ymgysylltu â rhieni a'r gymuned yn ogystal â Rhaglen Ymgysylltu ragweithiol.

Rôl 'cymunedau dysgu' Cymunedau yn Gyntaf yn y dyfodol wrth gau'r bwch cyrhaeddiad

Ar ôl ymgynghori yn 2011, addaswyd Cymunedau yn Gyntaf i fod yn Rhaglen Trechu Tlodi sy'n Canolbwyntio ar y Gymuned. Ei nod yw lleihau'r bylchau sy'n bodoli ym maes addysg/sgiliau, economaidd ac iechyd rhwng yr ardaloedd mwyaf difreintiedig a'r ardaloedd sy'n well eu byd, drwy wneud y canlynol:

- cefnogi unigolion, teuluoedd a grwpiau o bobl sydd â'r canlyniadau addysg/sgiliau, economaidd ac iechyd gwaethaf;
- cefnogi'r rheini sy'n byw yn yr ardaloedd mwyaf difreintiedig;
- cynyddu sgiliau bywyd, hunan-barch a hunandibyniaeth unigolion, gan gynnwys eu gallu ariannol;
- cefnogi a chryfhau'r gweithgareddau lleol sy'n gwneud y mwyaf i fynd i'r afael â thlodi ac amddifadedd.

Mae 52 o Glystyrau Cymunedau yn Gyntaf yng Nghymru erbyn hyn, sy'n cyfrif am oddeutu 24% o'r boblogaeth.

Ym mis Tachwedd 2013, cyhoeddodd y Gweinidog Cymunedau a Threchu Tlodi y byddai'r Rhaglen yn cael ei hymestyn dros oes y Llywodraeth bresennol, yn amodol ar werthusiadau a chyfyngiadau cyllidebol yn y dyfodol.

Cymunedau Dysgu

Mae'r canlyniad hwn yn cael cefnogaeth gref yng Nghynlluniau Cyflawni pob Clwstwr. Mae prosiectau sy'n cefnogi'r canlyniad hwn yn cynnwys:

- clybiau gwaith cartref
- grwpiau i blant bach sy'n canolbwyntio ar baratoi plant ar gyfer yr ysgol
- dosbarthiadau llythrennedd a rhifedd yn fwy cyffredinol ond hefyd i roi cyfle i blant a rhieni astudio gyda'i gilydd

- cynlluniau i wella sgiliau sylfaenol, gan gynnwys cynlluniau ar gyfer pobl ifanc agored i niwed, plant o grwpiau lleiafrifol neu grwpiau anodd eu cyrraedd
- cynlluniau wedi'u hanelu at wella lefelau cyrhaeddiad yng nghyfnodau allweddol 2, 3, a 4

Mae'r Rhaglen Cymunedau yn Gyntaf yn cefnogi dros 100 o swyddi sy'n canolbwyntio ar addysg a dysgu, gan gynnwys cynlluniau dysgu i deuluoedd.

Cronfa Arian Cyfatebol Grant Amddifadedd Disgyblion Cymunedau yn Gyntaf

Mae Cronfa Arian Cyfatebol Grant Amddifadedd Disgyblion Cymunedau yn Gyntaf yn cynnig arian cyfatebol i Glystyrau Cymunedau yn Gyntaf yn erbyn y Grant Amddifadedd Disgyblion sy'n cael ei ddyrannu i'w hysgolion lleol.

Mae'r grant yn ceisio cynyddu nifer yr ysgolion sy'n gweithio gyda'r Clystyrau a datblygu'r cysylltiadau gwaith da sy'n bodoli mewn Clystyrau Cymunedau yn Gyntaf lle mae'r gwaith hwn yn digwydd yn barod. Y Gweinidog Addysg a Sgiliau.